



Rabu, 16 Maret 2022

Ogen: Matius 21:1-11



PUJIN MAN ANAK DAUD



Keriahen ukur ngasup erbahan kai pe ibas kegeluhen manusia. Dikune arapen si enggo ndekah itima-timai seh ibas paksana tempa bagi lau maler ku taneh si kerah. Bageme tedehna ate bangsa enda nandangi sekalak pemimpin simpersadaken bangsana bagepe mimpin alu benar ras bujur. Pemimpin singukurken kegeluhen kalak sinterem, la ngukurken diri ras jabuna saja. Sabab paksa e kalak Jahudi ijajah Roma dengen pemimpin si lit pe la rukur guna kiniulin ras kesejahteraan rayatna. Emaka arapen nandangi sekalak pemimpin si ngumban kepemimpinan Daud tetap iarap-arapken ras itimai sebage 'mesias' si mulahi bangsa enda ibas penjajahan ras mpersadaken Israel mulihi.

Enda me sierbahan kerehen Jesus tuhu-tuhu iarapken kalak sinterem. Jesus enggo itandai erkiteken kemediatenna nandangi kalak sinterem, kalak sisakit, sikelehen. Ertina enggo igejab kalak sinterem IA sebage mesias nandangi bangsana. Ituriken paksa Ia bengket ku Jerusalem, kalak sinterem ngalolangalo Ia alu symbol si luar biasa erkiteken kerehenna pe alu simbol sidem kiniteruken ukur eme inangkihiNa kelede, si la ngandalken gegeh ras symbol peperangen tapi perdamen. Emaka surak-surak si meriah ngataken 'pujin man anak Daud' alu nektek lambe dengen iamparken idalan, tanda kehamaten. Enda me erti minggu 'palmarum'.

Kai ras kuga nge arapenta nandangi Tuhan Jesus Kristus? Ia mesias simulahi kita arah erbage kuasa dosa dengen kinilaadilen doni enda. Pujilah Ia segedang-gedang geluhta sabab man baNa ngenca pujin ras kemulian. Dingen siperlu sisaksiken ibas kegeluhennta amin la kita hadir ibas jaman Jesus tapi perukuren, perbahanen ras kerina kecibal geluhta min jadi pujiin man baNa saja.

Mari surak man Mesias simulahi kita